



UKA 2019/39
30. september 2019
Múte Bourup Egede

Aningaasanut inatsimmi konto pingaarneq 64.01.05 naapertorlugu inuussutissarsiutitigut nunaqarfinnut isorliunerusunullu siuarsaanermik tapiissutinik suliassap ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqquutillu tassunga attuumassuteqartup 2019-p ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Ilaqutariit taamatullu inuiaqatigiit peqqisut pilersikkumallugit, amerlanerpaallu imminut napatinnissaat angujumallugu inuussutissarsiornikkut ingerlalluartaqarnissaa qitiulluinnartut ilagaat.

Nunarput isorartooq peqqarniissinnaasartumillu avatangiisilik; inoqarfinni innuttaqqortussutsikkut, atukkatigut periarfissatigullu assigiinngisitaarfioqisoq nunagaarput. Inoqarfiit ilaat sikusartumiipput. Ilaat avanngarusimalluartuni imaaliallaannaq tikinneqarsinnaagatik. Ilaat nunalerinikkut periarfissagissaartuupput. Ilaat innuttaqqortullutillu tikikkuminartumiinnermikkut niuernerpalaartumik aningaaserivitsigullu imaaliallaannaq periarfissagissaartuupput. Ilaat innuttaqqortuallaaratik inuussutissarsiornikkut periarfissagissaaraluarlutik aningaaserivitsigut periarfissaqarpiangitsuuupput. Assersuutissat suli amerlagunaraluaqaat. Naatsumilli oqaatigalugu, tassa nunatta isorartuup assigiinngisitaarfiusup inuussutissarsiornikkut qanoq periarfissaqarlunilu aporfiusinnaasunik peqarfiusinnaanerani assersuutit ersersitsipput.

Siunnersuuteqartoq Aqqaluaq Biilmann Egede, Inuit Ataqatigiit qutsavigiumavarput siunnersuummut qaqitaanut. Siunnersuuteqartup tunngavilersuutaani ilisarnartut ilagaat sineriammi namminersorlutik inuussutissarsiortut imaluunniit namminersorlutik inuussutissarsiuteqalerusuttut, pisortat inuussutissarsiutinik siuarsaanermik tapiisarnermillu aningaasaliissutaasa pissarsiariniarnerinik periarfissaniit akimmiffissanik peqarnerusarnera. Ilaanni periarfissanik atuijumagaluartut saaffiginninnerminniit allaat piffissami sivisuumi akineqarnissartik utaqqingaatsiartaraat apunneqartartut ilagaat. Piffissaq utaqqinerlu pingaartumik namminersorlutik inuussutissarsiuteqartunut ineriartornissaagaluap nalorniffiulernerani aningaasanillu nammineq kaasarfimmiiit akilertariaqartumik kinguneqartarluni.

Namminersorlutik Oqartussat Naalakkersuisut akissutigisartagaasigut aamma uunnga siunnersuummut, kusanavimmik sullissisutut isikkoqartarput. Ataqatigiissorinangitsorli tassaavoq, pisortat sullissilluartutut imminut nalilerpata taava sooq sineriammi angalatilluta eqartumik sullissisoqarnera uteqqaaffigineqartuartaarpa?

INUIT ATAQATIGIIT

Inatsisartuni



Ilami ilaanni pisortat inuussutissarsiornermi aningaasaliissutaannik attartortorniarlutik tapiiffigineqarniarlutilluunniik saaffiginnittut marloqiusamik allaffissortoqartarnerannik apuussaqaartarnerat takornartaangilaq. Tassa kommuneminni kiisalu Namminersorlutik Oqartussat allaffii aqqusaaqqaartariaasarlugit nalaassisoqartarpoq, piffissaajarnermik kinguneqartartumik.

Nalilersorneqartariaqarsoraarputtaaq Aningaasanut Inatsit aqputigalugu Inuussutissarsiornermut Naalakkersuisoqarfimmi konto pingaernerup 64-ip ataani pisinnaatitsissuterpasuarunik Naalakkersuisunut tunniussiinnartarnerput. Aappagu 2020-mut Aningaasanut Inatsisissami Siunnersuutaasumi, kontop pingaernerup 64-ip iluani kontot tamarluinnangajammik, siunertaanniit allatut atorneqarsinnaannerannik pisinnaatitsisutunik Naalakkersuisut Inatsisartunut qinnuteqarput. Taamaammat Naalakkersuisut siunnersuutip maanna sammisatta apeqqusersorneranut tunngavilersuutaat utertikkusunarput. Siunnersuummi taamak apeqqusersorniaaraanni, tassa aningaasaliissutit siunertaannut atorneqarunnaarnissaat aarlerisaarutigalugu. Taava nammineq aningaasaliissutit allatut atorsinnaanerinut pisinnaatitsissuteqarnissarlunniit pisariaqangitsutut naqissuserneqartariaqarsorinaraluarimat.

Pisinnaatitsissutit maanna Inatsisartut uagut Naalakkersuisunut tunniutiinnartakkatta, sukumiisumik qulaajaavigalugit annikinnerpaaffianiitsinnissaat Inuit Ataqatigiit isumarput naqissuseqqissavarput. Sulineq pissaanerup agguarneqarsimanerani pitsaanerusoq aningaasaliissutillu siunertaminnorpiaq atorneqartarnissaannut qulakkeerinninnissaq aamma tassaniimmat.

Inuit Ataqatigiit isumaqarput, nunatta kangianiikkutta kitaaniikkuttaluunniit, avannaaniikkutta, qeqqaniikkutta kujataaniikkuttaluunniit, taava allaffissornikkut pisortanit eqaannerpaamik sullinneqarnissarput qitiutinneqartuaannartariaqartoq. Taamaalillunilu marloqiusamik sullissinerit nungutinnaannik sulineq ingerlattuartariaqaripput.

Siunnersuuteqartup siunnersuutaata tunngavia tapersorsorlugu naqissuseqqissavarput, tassa inuussutissarsiortut nunaqarfinni illoqarfinnilu inissisimasut pisortanit sullinneqarnerat kommuniiittariaqartoq. Kommunini inuussutissarsiutit suut inerisarluarneqarsinnaanersut pissutsillu qanimut ilisimaneqarlutik, siunissami qanoq ineriartortinneqarsinnaanersut qanorlu anguniagaqartut - inuussutissarsiortut attaveqarfiguarnerisigut ilisimallugit kommunit kiffartuussilluarnissaannut toqqammavigissaarnerusut isumaqaratta. Qitiusumiit aqutsineq innuttaasunut qaninnerusumut nuunniartigu. Sinaakkusiilluarnisigut aningaasaliissutit kommuneni siunertaasunut atorneqartassasut uagut upperigatsigu, imaattumik siunnersuummut allanguutissatut siunnersuuteqarpugut, imatut isikkulimmik:

Aningaasanut inatsimmi inuussutissarsiornermi siuarsaanermik tapiissutitullu aningaasaliissutit, ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqqutillu tassunga attuumassuteqartup 2019-ip ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut. Aningaasaliissutit eqaallisaaniarluni nuunneqartussat siunertaminnut atorneqarnissaat suliami qulakkeerneqassaaq.